

նում ենք Հայաստանում, գլխավորապես Արշակունցի գործ է :

Արշակունցիների անկումից յետոյ բնական է որ նրանց ստեղծած եւ հովանաւորած իրաւակարգը սկսուած է եղծուել, քայքայուել : Երբ հայ գիրը երեւան եկաւ, նախարարական շէնքը արդէն փլուած էր էպպէս :

Ձի կարելի ասել որ անգամ անդրանիկ հայ պատմական գործերը փայլում են նախարարական նիստ ու կացի դիտութեամբ : Լաւագոյն պատմիչը՝ Բիւզանդ կամ ժլատ է կամ շատ տեղեակ չէ : Արշակի շինարարութեան մասին խօսելիս պատեհ առիթ էր պարզելու այն կարգերը, որոնց վերականգնումը յատկացնում է Արշակին : Սակայն, աւելի բան չի գտնում՝ ասելու քան այն, որ սպարապետութիւնը արւում է Մամիկոնեաններին, հազարապետութիւնը Գնունի տան, որ շատ գործակալներ կային եւ որ բարձերի թիւը հասնում էր ինն հարիւրի :

Հայ անդրանիկ պատմական գործերում խրատական միտումները բաւականին մթազնում են իրականութիւնը եւ ճոռոմբան լեզուն յաճախ խեղղում է պարզ եւ շիտակ խօսքը : Պատմական կարեւոր տեքմիները կորցնում են իրենց անհատականութիւնը ճարտասանական խառնուշիթով մէջ : Կանգնել նրանց երբեմնեան ուրոյնութիւնը, որոշել նրանց տեղը հասարակական կազմի մէջ դժուար խնդիր է : Մասնագրական համեմատութիւնները բարար միջոց չեն դրական արդիւնքի յանգելու : Հարկաւոր է ուրիշ օժանդակ մեթոդ, առաջնորդող տեսական հայեացք :

Անշուշտ գովական են պ. Մանանդեանի ջանքերը՝ օգտաւէտելու եւրոպական Փէոդաւրական տեսութիւնները, բայց ընտրութիւնը անյաջող է : Գ. Կնապպի հայեացքը որին նա դիմում է, ոչ միայն նոր չէ, ինչպէս յայտարարում է, այլ եւ ուղիղ չէ : Նորագոյն տեսակէտով, ճորտութեան պատճառը տնտեսական որոշ եղանակը չէ, այլ հարկահաւաքի որոշ սիստեմը :

Միակողմանի է եւ պ. Մանանդեանի դիրքը շինականութեան խնդրում, քանի որ եւլակէտ ունի միայն հարկատուութիւնը եւ անտես է առնում միանդամայն հողային սեփականութեան սկզբունքը :

Կոստանդին Մեծի ժամանակից — հետոն չգնանք — վայսերական օրէնքը զանազանում էր երկու տեսակ հողային սեփականութիւն, territoria եւ possessiones, այն է պետական հող եւ կալուածական :

Ըստ հողի զանազանում էին եւ գիւղացիք :

Տերրիտորիայի վերայ ապրում էր ազատ գիւղացիութիւնը, որ կոչւում էր plebeius. Իսկ կալուածական հողերի գիւղացին կոչւում էր colonus :

Պէտք է գիւղացին սեփականատէր է իր հողամասի եւ վայելում է սեփականութեան իրատունքները լիովին : Իր հողային սահմանեալ հարկը հատուցանում է անմիջապէս պետութեան :

Կորոնը, ընդհակառակը, տէր չէ իր հողի, սեփականութեան իրաւունքը պատկանում է կալուածատիրոջ, ինքը գիւղացին միայն tennancier, 'կալող կամ հողակալ', եւ իր հողամասի համար հարկ է վճարում ոչ միայն պետութեան, այլ առանձին հողավարձ կամ կապալագին է տալիս կալուածատիրոջ, որ կոչւում է սովորաբար canon :

Կալուածական հողերի սեփականատէրերն են նախ արքայական տունը, յետոյ եկեղեցին, եւ վերջապէս մասնաւոր անձինք :

Կորոնները անկախ իրենց հողային տէրերից բաժանում էին երկու կարգի : Պ. Մանանդեան կամ իր առաջնորդ գերման գիտնականը կարծում է, որ բաժանումը բխում է տնտեսական երկու տարրեր սիստեմներից : Առաջինը իբրեւ թէ հողատիրական է (Grundherrschaft), երբ կալուածատէրը ստանում է միայն հարկեր, երկրորդը հողատնտեսական (Gutsherrschaft), երբ կալուածատէրը ինքն է մշակում հողը բունի աշխատել տալով գիւղացիներին, որտեղից իբրեւ թէ սկիզբն է առնում ճորտութիւնը :

Այս հայեացքը լոկ տեսական կերտուած է, հակառակ պատմական իրականութեան :

Կորոնների զանազանութիւնն այլ ծագում ունի :

Կայ երկու տեսակ կորոն, մինն է originalis, 'տեղական' միւսը՝ inquilinus 'եկարնակ'. առաջինը հաստատուած է մշտապէս եւ ժառան-